

La Quotidiana 28-8-2014, p. 2

## «Dialog tranter giuven e vegl essenzial»

(anr/fa) La presidenta seniora deputada Christina Bucher-Brini (ps, Cuira) ha tegnì il pled d'avertura per la sessiun che ha cumenzà ier. Ella ha laschè vegnir a pled er il pli giuven deputà, Tino Schneider (pcd, Cuira). Essend ch'il cussegl grond aveva mesemna anc d'eleger ses nov president, *Duri Campbell* (pbd, Engiadin'Ota), ha tegnì *Christina Bucher-Brini* il pled d'avertura. Ella è la commembra la pli veglia dal parlament grischun. Sco emprim ha Bucher-Brini menziunà ch'il cussegl grond vegnia a dastgar s'occupar er en la proxima legislatura cun ina gronda varietad da temas. In da quels è tenor ella la discussiun davart las fusiuns da vischnancas che vegnia a cuntinuar. «Sche nus avain tschernì durant l'ultima perioda da legislatura la dretga direcziun pertutgant las regiuns vegn a decider il pievel grischun.» La cultura, la segirezza, la natira e las dumondas socialas èn, sco ch'ella ha ditg, era temas che vegnan ad occupar il parlament grischun. Christina Bucher-Brini ha appellà a tut sias e ses collegas giuven e vegls: «entrain en dialog, avain la prontezza da tadlar in l'auter e da chattar ensemen soluziuns progressivas per l'entira societad.»

La presidenta seniora ha ditg ch'i saja conscient ad ella che las commembras ed ils commembers giuven dal cussegl grond vegnian ad avair autras opiniuns che ella. Perquai ha ella dà il pled al pli giuven deputà, a *Tino Schneider* (pcd, Cuira). Quel ha ditg ch'el giavischia «che las deputadas ed ils deputads cumprovads partian lur experientschas cun nus novs e permettian a medem temp in vent frestg en il manaschi dal cussegl grond.» Ch'el giavischassia era ch'ins haja respect envers la giuventetgna, ha menziunà Schneider, «nus tuts stuain ponderar pertge ch'ils giuven na vulan betg votar davart temas che concernan il futur.»